

摘藻堂四庫全書薈要

集部

欽定四庫全書薈要卷二萬八百十一

集部

詞綜卷十三

翰林院檢討朱彝尊編

宋詞六十八首

辛棄疾

三十  
五首

范成大

五首

黃公度

三首

葛立方

一首

張孝祥

五首

姚寬

三首

程垓

十六  
首

辛棄疾

字幼安歷城人耿京聚兵山東節制忠義軍馬留掌書記令奉表南歸高宗召見授承務

郎累官浙東安撫使加龍圖閣待制進樞密  
都承旨德祐初以謝枋得請贈少師謚忠敏  
有稼軒長短句十二卷

青玉案

元夕

東風夜放花千樹更吹隕星如雨寶馬雕車香滿路鳳  
簫聲動玉壺光轉一夜魚龍舞蛾兒雪柳黃金縷笑  
語盈盈暗香去衆裏尋他千百度驀然回首那人却在  
燈火闌珊處

踏莎行

中秋後二夕帶  
湖家尚小酌

夜月樓臺秋香院宇笑吟吟地人來去是誰秋到便淒涼當年宋玉悲如許隨分盃盤等閒歌舞問他有甚堪悲處思量却也有悲時重陽節近多風雨

又

和趙興國  
知錄韻

吾道悠悠憂心悄悄最無聊處秋先到西風林外有啼鴉夕陽山下多衰草長憶商山當年四老塵埃也走咸陽道為誰書到便幡然至今此意無人曉

念奴嬌

書東流  
村壁



野塘花落又匆匆過了清明時節  
剗地東風欺客夢一枕雲屏寒怯  
曲岸持觴垂楊繫馬此地曾經別  
樓空人去舊遊飛燕能說聞道綺  
陌東頭行人曾見簾底纖纖月  
舊恨春江流不盡新恨雲山千疊  
料得明朝尊前重見鏡裏花難折  
也應驚問近來多少華髮

破陣子

為陳同甫賦  
壯詩以寄之

醉裏挑燈看劍夢回吹角連營  
八百里分麾下炙五十絃翻塞外聲  
沙場秋點兵馬作的盧飛快弓如霹靂

弦驚了却君王天下事贏得生前身後名可憐白髮生  
祝英臺近

寶釵分桃葉渡烟柳暗南浦怕上層樓十日九風雨斷  
腸點點飛紅都無人管更誰勸流鶯聲住鬢邊覷試  
把花卜歸期才簪又重數羅帳燈昏哽咽夢中語是他  
春帶愁來春歸何處却不解帶將愁去

沁園春

帶湖  
新居

三徑初成鶴怨猿驚稼軒未來甚雲山自許平生意氣

衣冠人笑抵死塵埃意倦須還身閒貴早宜為蓴羹鱸  
膾哉秋江上看驚弦鴈避駭浪船回東崗更葺茅齋  
好都把軒窓臨水開要小舟行釣先應種柳疎籬護竹  
莫礙觀梅秋菊堪餐春蘭可佩留待先生手自栽沉吟  
久怕君恩未許此意徘徊

滿江紅

家住江南又過了清明寒食花徑裏一番風雨一番狼  
籍紅粉暗隨流水去園林漸覺清陰密算年年落盡刺

桐花寒無力 庭院靜空相憶無處說閒愁極怕流鶯  
乳燕得知消息尺素如今何處也綠雲依舊無踪跡謾  
教人羞去上層樓平蕪碧

又

敲碎離愁紗窓外風搖翠竹人去後吹簫聲斷倚樓人  
獨滿眼不堪三月暮舉頭已覺千山綠但試把一紙寄  
來書從頭讀 相思字空盈幅相思意何時足滴羅襟  
點點淚珠盈掬芳草不迷行客路垂楊只礙離人目最

苦是立盡月黃昏闌干曲

又送李正之  
提刑入蜀

蜀道登天一盃送繡衣行客還自歎中年多病不堪離  
別東北看騰諸葛表西南更草相如檄把功名收拾付  
君侯如椽筆兒女淚君休滴荆楚路吾能識要新詩  
準備廬山山色赤壁磯頭千古浪銅鞮陌上三更月正  
梅花萬里雪深時須相憶

又江行簡楊濟  
翁周顯先

過眼溪山怪都是舊時曾識還記得夢中行遍江南江北佳處徑須携杖去能消幾兩平生屐笑塵勞三十九年非長為客吳楚地東南坼英雄事曹劉敵被西風吹盡了無塵跡樓觀甫成人已去旌旗未卷頭先白歎人生哀樂轉相尋今猶昔

水調歌頭

舟次揚州和楊濟翁周顯先韻

落日塞塵起跨馬獵清秋漢家組練十萬列檻輦層樓誰道投鞭飛渡憶昔鏑鳴血污風雨佛狸愁季子正年

少匹馬黑貂裘 今老矣搔白首過揚州倦游欲去江  
上手種橘千頭二客東南名勝萬卷詩書事業嘗試與  
君謀莫射南山虎直覓富平侯

又

四坐且勿語聽我醉中吟池塘春草未歇高樹變鳴禽  
鴻鴈初飛江上蟋蟀還來牀下時序百年心誰要鄉料  
理山水有清音 歡多少歌長短酒淺深而今已不如  
昔後定不如今間處直須行樂良夜更教秉燭高會惜

分陰白髮短如許黃菊倩誰簪

又

壬子三山被召陳  
端仁給事飲餞

長恨復長恨裁作短歌行何人為我楚舞聽我楚狂聲  
余既滋蘭九畹又樹蕙之百畝秋菊更餐英門外滄浪  
水可以濯吾纓一盃酒問何似身後名人間萬事毫  
髮常重泰山輕悲莫悲生離別樂莫樂新相識兒女古  
今情富貴非吾事歸與白鷗盟

又



帶湖吾甚愛千丈翠奩開先生杖履無事一日走千回  
凡我同盟鷗鷺今日既盟之後來往莫相猜白鶴恁何  
處嘗試與偕來破青萍排翠藻立蒼苔窺魚笑汝癡  
計不解舉吾杯廢沼荒丘疇昔明月清風此夜人世幾  
歡哀東岸綠陰少楊柳更須栽

賀新郎

別茂嘉  
十二弟

綠樹聽鶗鴂更那堪杜鵑聲住鷓鴣聲切啼到春歸無  
啼處苦恨芳菲都歇算未抵人間離別馬上琵琶關塞

黑更長門翠輦辭金闕看燕燕送歸妾 將軍百戰身  
名裂向河梁回頭萬里故人長絕易水蕭蕭西風冷滿  
座衣冠似雪正壯士悲歌未徹啼鳥還知如許恨料不  
啼清淚長啼血誰伴我醉明月

又

賦琵琶

鳳尾龍香撥自開元霓裳曲罷幾番風月最苦潯陽江  
頭客畫舸亭亭待發記出塞黃雲堆雪馬上離愁三萬  
里望昭陽宮殿孤鴻沒絃解語恨難說 遼陽驛使音

塵絕瑣窗寒輕攏慢撚淚珠盈睫推手含情還却手一  
抹梁州哀徹千古事雲飛烟滅賀老定場無消息想沉  
香亭北繁華歇彈到此為嗚咽

木蘭花慢

滁州送  
花倅

老去情味減對別酒怯流年況屈指中秋十分好月不  
照人圓無情水都不管共西風只管送歸船秋晚尊鱸  
江上夜深兒女燈前 征衫便好去朝天玉殿正思賢  
想夜半承明留教視草却遣籌邊長安故人問我道愁

腸殢酒只依然目斷秋霄落鴈醉來時響空絃

摸魚兒

淳熙己亥自湖北漕移湖南  
同官王正之置酒小山亭賦

更能消幾番風雨匆匆春又歸去惜春長怕花開早何  
況落紅無數春且住見說道天涯芳草無一作迷歸路怨

春不語算只有殷勤畫簷蛛網盡日惹飛絮長門事

準擬佳期又誤蛾眉曾有人妒千金縱買相如賦脉脉

此情誰訴君莫舞君不見玉環飛燕皆塵土閒愁最苦

休去倚危欄斜陽正在烟柳斷腸處

羅大經云詞意殊  
怨使在漢唐時寧

不賈種豆種桃之禍然聞壽皇見此  
詞頗不悅終不加以罪可謂盛德

太常引

建康中秋夜  
為呂潛叔賦

一輪秋影轉金波飛鏡又重磨把酒問姮娥被白髮欺  
人奈何 乘風好去長安萬里直下看山河所去桂婆  
娑人道是清光更多

水龍吟

過南礪  
雙溪樓

舉頭西北浮雲倚天萬里須長劒人言此地夜深長見  
斗牛光焰我覺山高潭空水冷月明星淡待燃犀下看

凭欄却怕風雷怒魚龍慘  
峽東蒼江對起過危樓欲  
飛還斂元龍老矣不妨高卧冰壺涼簟千古興亡百年  
悲笑一時登覽問何人又卸片帆沙岸繫斜陽纜

又

旅次  
登樓

楚天千里清秋水隨天去秋無際遙岑遠目獻愁供恨  
玉簪螺髻落日樓頭斷鴻聲裏江南遊子把吳鉤看了  
闌干拍遍無人會登臨意  
休說鱸魚堪鱠儘西風季  
鷹歸未求田問舍怕應羞見劉郎才氣可惜流年憂愁

風雨樹猶如此倩何人喚取紅巾翠袖搵英雄淚

鷓鴣天

鷺湖歸  
病起作

枕簟溪堂冷欲秋斷雲依水晚來收紅蓮相倚深如怨  
白鳥無言定是愁書咄咄且休休一丘一壑也風流  
不知筋力衰多少但覺新來嬾上樓

西河

送錢仲耕自江  
西移守婺州

西江水道是西江人淚無情却解送行人月明千里從  
今日日倚高樓傷心烟樹如薺會君難別君易草草

不知人意十年著破繡衣茸種成桃李問君可是厭承  
明東方鼓吹千騎對梅花更消一醉看明年調鼎風  
味老病自憐憔悴過吾廬定有幽人相問歲晚淵明歸  
來未

永遇樂

京口北固  
亭懷古

千古江山英雄無覓孫仲謀處舞榭歌臺風流總被雨  
打風吹去斜陽草樹尋常巷陌人道寄奴曾住想當年  
金戈鐵馬氣吞萬里如虎元嘉草草封狼居胥意氣



得倉皇北顧四十三年望中猶記燈火揚州路可堪回首  
佛狸祠下一片神鴉社鼓憑誰問廉頗老矣尚能飯  
否

岳倦翁云此作  
微覺用事多

漢宮春

立春

春已歸來看美人頭上裊裊春幡無端風雨未肯收盡  
餘寒年時燕子料今宵夢到西園渾未辨黃柑薦酒更  
傳青韭堆盤却笑東風從此便薰梅染柳更沒些閒  
閒時又來鏡裏轉變朱顏清愁不斷問何人會解連環

生怕見花開  
花落朝來塞鴈先還

又

會稽秋風  
亭觀雨

亭上秋風記去年  
嫋嫋曾到吾廬  
山河舉目雖異風景  
非殊功成者去  
覺團扇便與人疎  
吹不斷斜陽依舊  
茫茫禹跡都無  
千古茂林猶在  
甚風流章句解擬相如  
只今木落江冷  
渺渺愁余  
故人書報莫因循  
忘却尊鱸  
誰念我新涼燈火  
一編太史公書

新荷葉

和趙德  
莊韻

人已歸來杜鵑欲勸誰歸綠樹如雲等閒付與鶯飛兔  
葵燕麥問劉郎幾度沾衣翠屏幽夢覺來水繞山圍  
有酒重携小園隨意芳菲往日繁華而今物是人非春  
風半面記當年初識崔徽南雲鴈少錦書無箇因依

南鄉子

登京口  
北固亭

何處望神州滿眼風光北固樓千古興亡多少事悠悠  
不盡長江滾滾流年少萬兜鍪坐斷東南戰未休天  
下英雄誰敵手曾劉生子當如孫仲謀

蝶戀花

元日  
立春

誰向椒盤簪綵勝  
整整韶華爭上春  
風鬢往日不堪重  
記省為花常把新春恨  
春未來時先借問  
晚恨開遲  
早又飄零  
近今歲花期消息定  
只愁風雨無憑準

清平樂

獨宿博山  
王氏菴

遶牀饑鼠蝙蝠翻  
燈舞屋上松風吹急雨  
破紙窓間自語  
平生塞北江南歸來  
華髮蒼顏布被秋宵  
夢覺眼前萬里江山

菩薩蠻

書江西造口壁

鬱孤臺下清江水中間多少行人淚西北是長安可憐  
無數山 青山遮不住畢竟東流去江晚正愁余山深

聞鷓鴣

羅大經云南渡初金人追隆祐太后御舟至造口不及而還鷓鴣之句謂恢復之事行不得也

生查子

有覓詞者為賦

去年燕子來繡戶深深處花徑得泥歸都把琴書污  
今年燕子來誰聽呢喃語不見捲簾人一陣黃昏雨

浪淘沙

山寺夜作

身世酒杯中萬事皆空古來三五箇英雄雨打風吹何  
處是漢殿秦宮夢入少年叢歌舞匆匆老僧夜半誤  
鳴鐘驚起西窗眠不得捲地西風

定風波

暮春漫興

少日春懷似酒濃插花走馬醉千鍾老去逢春如病酒  
惟有茶甌香篆小薰籠卷盡殘花風未定休恨花開  
原自要春風試問春歸誰得見飛燕來時相遇夕陽中

范成大

字致能吳郡人紹興中進士累官權吏部尚書參知政事尋帥金陵以病請閒進資政殿

學士領洞霄宮加大學士卒  
謚文穆有石湖集詞一卷

眼兒媚

萍鄉道中

酣酣日脚紫烟浮  
妍暖破輕裘  
困人天氣醉人花  
氣午夢扶頭  
春慵恰似春塘水  
一片縠紋愁  
溶溶曳曳東風無力  
欲皺還休

菩薩蠻

湘東驛

客行忽到湘東驛  
明朝真是瀟湘客  
晴碧萬重雲  
幾時逢故人  
江南如塞北  
別後書難得  
先自鴈來稀  
那堪

春半時

謁金門

宜春道中野塘春水可喜有懷舊隱

塘水碧仍帶麴塵顏色泥泥縠紋無氣力東風如愛惜  
恰似越來溪側也有一雙鷓鴣只欠柳絲千百尺繫  
船春弄笛

秦樓月

寒食日湖南提舉胡元高家席上聞琴

湘江碧故人同作湘中客湘中客東風回鴈杏花寒食  
溫溫月到藍橋側醒心絃裏春無極春無極明朝殘



夢馬嘶南陌

霜天曉角

梅

晚晴風歇一夜春堪折  
脉脉花疎天淡雲來去  
數枝月勝絕愁更絕  
此情誰與說惟有兩行  
低鴈知人倚闌干雪

黃公度

字思憲莆陽人紹興八年進士第一官尚書考功員外郎有知稼翁集詞一卷

好事近

湖上送殘春已負別時歸約好在故園桃李為誰開誰

落還家應是荔支天浮蟻要人酌莫把舞裙歌扇便  
等閒拋却

卜算子

別士季  
弟之官

薄宦各東西往事隨風雨先自離歌不忍聞又何況春  
將暮愁共落花多人逐征鴻去君向瀟湘我向秦後  
會知何處

青玉案

鄰雞不管離懷苦又還是催人去回首高城音信阻霜

橋月館水村烟市總是思君處  
裊殘別袖燕支雨謾

留得愁千縷欲倩歸鴻分付與鴻飛不住倚欄無語獨

立長天暮

按本集公登第後為趙忠簡所器而秦檜頗銜之及召赴行在雖知非當路意而迫於君

命故寓意此詞  
益去就早定矣

葛立方

字常之丹陽人勝仲子紹興八年進士官至吏部侍郎有歸愚集詞一卷

卜算子

裊裊水芝紅脉脉薰葭浦浙浙西風澹澹烟幾點疎疎  
雨草草展杯觴對此盈盈女葉葉紅衣當酒船細細

# 流霞舉

張孝祥

字安國烏江人紹興二十四年廷試第一累遷中書舍人直學士院兼都督府參贊軍事

領建康留守尋以荆南湖北路安撫使請

祠進顯謨閣直學士有于湖集詞一卷

黃叔暘云于湖有紫薇雅詞湯衡為序稱其平昔未嘗著藁筆酣興健頃刻即成却無一

字無來處

滿江紅

聽雨

斗帳高眠寒窓靜瀟瀟雨意南樓近更移三鼓漏傳一  
水點點不離楊柳外聲聲只在芭蕉裏也不管滴破故

鄉心愁人耳 無似有遊絲細聚復散真珠碎天應分  
付與別離滋味破我一牀蝴蝶夢輸他雙枕鴛鴦睡向  
此際別有好思量人千里

念奴嬌

星沙初下望重湖遠水長雲漠漠一葉扁舟誰念我今  
日天涯飄泊平楚南來大江東去處處風波惡吳中何  
地滿懷俱是離索長記送我行時綠波亭上泣透青  
羅薄檣燕低飛人去後依舊湘城簾幕不盡山川無窮

烟浪辜負秦樓約  
漁歌聲斷為君雙淚傾落

鷓鴣天

日日青樓醉夢中  
不知樓外已春濃  
杏花未濕疎疎雨  
楊柳初搖短短風  
扶畫鷁  
躍花驄  
湧金門外小橋東  
行行又入笙歌裏  
人在珠簾第幾重

西江月

洞庭

問訊湖邊春色重  
來又是三年東風吹我過湖船  
楊柳絲絲拂面  
世路如今已慣  
此心到處悠然  
寒光亭下

水連天飛起沙鷗一片

六州歌頭

長淮望斷，關塞莽然平。征塵暗，霜風勁，悄邊聲。黯銷凝。  
追想當年事，殆天數，非人力。洙泗上，絃歌地，亦殫寧。隔  
水村鄉，落日牛羊下，區脫縱橫。看名王宵獵，騎火一川，  
明笳鼓悲鳴。遣人驚。念腰間箭匣中，斂空埃，蠹竟何  
成。時易失，心徒壯，歲將零。渺神京，千羽方懷遠，靜烽燧，  
且休兵。冠蓋使，紛馳騫，若為情。聞道中原遺老，常南望，

翠葆霓旌使行人到此忠憤氣填膺有淚如傾

朝野遺記云安

國在建康留守席上賦此  
歌闋魏公為罷席而入

姚寬

字令威剡川人為六部監門有西溪居士樂府一卷

憶王孫

毵毵楊柳綠初低  
澹澹梨花開未齊  
樓上情人聽馬嘶  
憶郎歸  
細雨春風濕酒旗

生查子

郎如陌上塵  
妾似隄邊絮  
相見兩悠悠  
揚踪跡無尋處



酒面撲春風淚眼零秋雨過了別離時還解相思否

踏莎行

蘋葉烟深荷花露濕碧蘆紅蓼秋風急采菱渡口日將  
沉飛鴻樓上人空立彩鳳難雙紅綃暗泣回紋未剪  
吳刀澀夢魂歸處不留踪厭厭一夜涼蟾入

程

垓

字正伯眉山人有  
書舟雅詞一卷

按正伯與子瞻為中表  
兄弟故其詞有相亂者

酷相思

月挂霜林寒欲墜正門外催人起柰離別如今真箇是  
欲住也留無計欲去也來無計馬上離魂衣上淚各  
自箇供憔悴問江路梅花開也未春到也須頻寄人到  
也須頻寄

小桃紅

不恨殘花殢不恨殘春破只恨流光一年一度又催新  
火縱青天白日繫長繩也留春得麼花院從教鎖春  
事從教過燒筍園林嘗梅臺榭有何不可已安排珍簾

小胡牀待日長閒坐

芭蕉雨

雨過涼生藕葉晚庭消盡暑  
渾無熱枕簟不勝香滑爭  
柰寶帳情生金尊意愜  
玉人何處夢蛺思一見冰雪  
須寫箇帖兒叮嚀說  
試問道肯來麼  
今夜小院無人重  
樓有月

摸魚兒

掩淒涼黃昏庭院角聲何處鳴咽  
矮窓曲屋風燈冷還

是苦寒時節凝竚切念翠被薰籠夜夜成虛設倚窓愁  
絕聽鳳竹聲中犀幃影外簌簌釀寒雪傷心處却憶  
當年輕別梅花滿院初發吹香弄藥無人見惟有暮雲  
千疊情未徹又誰料而今好夢分胡越不堪重說但記  
得當初重門鎖處猶有夜深月

念奴嬌

秋風秋雨正黃昏供斷一窓愁絕帶減衣寬誰念我難  
忍重城離別轉枕褰帷挑燈整被總是相思切知他別

後負人多少風月 不是怨極愁濃只愁重見了相思  
難說料得新來魂夢裏不管飛來蝴蝶排悶人間寄愁  
天上終有歸時節如今無奈亂雲依舊千疊

南浦

金鴨嬾薰香向晚來春醒一枕無緒濃綠漲瑤窓東風  
外吹盡亂紅飛絮無言竚立斷腸惟有流鶯語碧雲欲  
暮空惆悵韶華一時虛度 追思舊日心情記題葉西  
樓吹花南浦老去覺歡疎傷春恨多付斷雲殘雨黃昏

院落問誰猶在凭欄處  
可堪杜宇但只解聲聲催他春去

滿庭芳

臨安  
晚登

南月驚烏西風破鴈又是秋滿平湖採蓮人靜寒色戰  
菰蒲舊信江南好景一萬里輕覓尊鱸誰知道吳儂未  
識蜀客已情孤  
憑高增悵望湘雲盡處都是平蕪問  
故鄉何日重見吾廬縱有荷紉芰製終不似菊短籬疎  
歸情遠三更雨夢依舊繞庭梧

漁家傲

彭門道中

獨木小舟烟雨濕燕兒亂點春江碧江上青山隨意覓  
人寂寂落花芳草催寒食昨夜青樓今日客吹愁不  
得東風力細拾殘紅書怨泣流水急不知那個傳消息

南鄉子

幾日訴離尊歌盡陽關不忍分此度天涯真個去消魂  
相送黃花落葉村斜日又黃昏蕭寺無人半掩門今  
夜粉香明日淚休論只要羅巾記舊痕

憶秦娥

青門深海棠開盡春陰陰春陰陰萬重雲水一寸歸心  
玉樓深鎖烟消沉知他何日同登臨同登臨待收紅  
淚細說如今

謁金門

春夜雨催潤柳塘花塢小院重門深幾許畫簾香一縷  
獨立晚庭凝竚細把花枝閒數燕子不來天欲暮說  
愁無處所



卜算子

獨自上層樓  
樓外青山遠  
望到斜陽欲盡時  
不見西飛燕  
獨自下層樓  
樓下蛩聲怨  
待到黃昏月上時  
依舊柔腸斷

菩薩蠻

畫橋拍拍春江綠  
行人正在春江曲  
花潤接平川  
有人花底眠  
東風原自好  
只怕催花老  
安得萬垂楊  
繫教春日長

愁倚欄令

春猶淺柳初芽杏初花楊柳杏花交映處有人家  
玉  
窓明煖烘霞小屏上水遠山斜昨夜酒多春睡重莫驚  
他

水龍吟

夜來風雨匆匆故園定是花無幾愁多怨極等閒孤負  
一年芳意柳困桃慵杏青梅小對人容易算好春長在  
好花長見元只是人憔悴  
回首池南舊事恨星星不

堪重記如今但有看花老眼傷時清淚不怕逢花瘦只  
愁怕老來風味待繁紅亂處留雲借月也須攔醉


洞庭春色

錦字親裁淚巾偷裛細說舊時記笑桃門巷妝窺寶靨  
弄花庭榭香濕羅衣幾度相隨游冶去任月細風尖猶  
未歸多少事有垂楊眼見紅燭心知如今事都過也  
但贏得雙鬢成絲歎半妝紅豆相思有分兩分青鏡重  
合難期惆悵一春飛絮夢恁悠颺教人分付誰銷魂處

又梨花雨暗半掩重扉



詞綜卷十三



總校官庶吉士臣張能照  
校對官中書臣潘庭筠  
謄錄監生臣馮曰琮

欽定四庫全書薈要

集部

詞綜卷十四



詳校官編修臣繆晉

欽定四庫全書薈要卷二萬八百十二

集部

詞綜卷十四

翰林院檢討朱彝尊編

宋詞六十八首

韓元吉

五首

周必大

一首

京鏜

一首

尤袤

一首

仲并

二首

朱熹

一首

真德秀

一首

趙汝愚

一首

洪适

四首

吳儆

四首





楊萬里 一首

李處全 二首

張震 二首

羅願 一首

崔與之 一首

劉克莊 八首

樓鏐 一首

吳琚 一首

趙彥端 七首

管鑑 一首

魏子敬 一首

甄龍友 一首

俞國寶 一首

衛元卿 一首

李石 二首

張鎡 三首

杜旗三首

劉凝四首

岳珂一首

程珌一首

王千秋一首

程先一首

蘇洵一首

劉圻父一首

韓元吉

字元咎號南澗許昌人官吏部尚書有焦尾集一卷

六州歌頭

東風著意先上小桃枝紅粉膩嬌如醉倚朱扉記年時  
隱映新妝面臨水岸春將半雲日煖斜陽轉夾城西草

軟沙平驟馬垂楊渡玉勒爭嘶認娥眉凝笑臉薄拂腮  
脂繡戶曾窺恨依依昔携手處香如霧紅隨步怨春  
遲消瘦損憑誰問只花知淚空垂舊日堂前燕和烟雨  
又雙飛人自老春長好夢佳期前度劉郎幾許風流地  
也應悲但茫茫暮靄目斷武陵溪往事難追

薄倖

送君南浦對烟柳青青萬縷更滿眼殘紅吹盡葉底黃  
鸝自語甚動人多少離情樓頭水濶山無數記竹裏題

詩花邊載酒魂斷江干春暮 都莫問功名事白髮星  
星如許任鷄鳴起舞鄉關何在憑高目盡孤鴻去漫留  
君住趁醪醕香煖持杯且醉瑤臺路相思記取愁絕西  
窓夜雨

謁金門

春雪

春尚淺誰把玉英裁剪儘道梅梢開未遍卷簾花滿院  
樓上酒融歌煖樓下水平烟遠却似湧金門外見絮  
飛波影亂

霜天曉角

題采石蛾眉亭

倚天絕壁直下江千尺天際兩蛾橫  
黛愁與恨幾時極暮潮風正急  
酒闌聞塞笛試問謫仙何處青山外  
遠烟碧

水龍吟

題三峯閣詠英華女子

雨餘疊巘浮空望中秀色仙都是  
洞天未鎖人間春好玉妃曾墜  
錦瑟繁絃鳳笙清響九霄歌吹問  
分香舊事劉郎去後知誰伴  
風前醉回首暝烟千里但紛紛落

紅如淚多情易老青鸞何許詩成誰寄斗轉參橫半簾  
花影一溪寒水悵飛鳧路杳行雲夢斷有三峯翠

周必大

字子充一字宏道廬陵人紹興二十一年進士歷官左丞相封益國公贈太師謚文忠有

省齋集近體  
樂府一卷

點絳脣

贈歌者  
小瓊

秋夜乘槎客星客到天孫渚眼波微注將謂牽牛渡  
見了還非重理霓裳舞雖無誤幾年一遇莫訝周郎顧

京

鏜

字仲遠豫章人登紹興二十七年進士第由縣令擢御史遷右司郎官出為四川安撫使

進刑部尚書慶元初官左丞相卒贈太保初謚文穆以家諱從其子請謚文忠改謚莊定

有松坡居士

樂府一卷

雨中花 重陽

玉局祠前銅壺閣畔錦城藥市爭奇正紫萸綴席黃菊  
浮巵巷陌連鑣並轡樓臺吹竹彈絲登高望遠一年好  
景九日佳期 自憐行客猶對佳賓留連豈是貪癡誰  
會得心馳北闕興寄東籬惜別未催鷁首追歡且醉蛾  
眉明年此會他鄉今日總是相思

尤

袤

字延之無錫人紹興中進士累官禮部尚書  
正奉大夫贈光祿大夫謚文簡有梁溪集

瑞鷓鴣

詠落  
梅

清溪西畔小橋東落月紛紛水映空五夜客愁花片裏

一年春事角聲中歌殘玉樹人何在舞破山香曲未

終却憶孤山醉歸路馬蹄香雪襯東風

仲并

字彌性江都人紹興中進士授平江教授改  
左承奉郎歷光祿寺丞終朝請大夫淮東安

撫司參議  
有浮山集

水調歌頭

浮遠  
堂



靜練平千頃華棟俯中流凌晨畫戟來看宿雨斷虹收  
八九胸中雲夢三千筆端風月無處快凝眸笑詠一堂  
上揮麈氣橫秋俯危欄紅日下暮雲收無窮偉觀祇  
應天意為君謀客我時醒時醉獨泛微烟微雨浩蕩逐  
輕鷗不羨岳陽勝丹碧聳層樓

念奴嬌

同前

練江風靜卧冰奩百尺朱欄飛入江遠浮天天在水水  
滿半天雲濕白鳥明邊青山斷處眼冷江頭立月明朝

上葦間漁唱聲急 幾度吹老蘋花野香無數欲寄應  
難及天借詩人供醉眼尊俎一時收拾竹裏行厨花間  
步障風雨生呼吸酒闌歌罷釣船先具簑笠

朱 熹

字元晦一字仲晦婺源人第進士仕至轉運  
副使崇政殿說書煥章閣待制致仕贈太師  
封信國公改徽國謚  
文有文公集詞一卷

水調歌頭

藥括杜牧之  
九日齊州詩

江水浸雲影鴻鴈欲南飛携壺結客何處空翠渺烟霏  
塵世難逢一笑況有紫萸黃菊堪插滿頭歸風景今朝

是身世昔人非  
酬佳節須酩酊莫相違  
人生如寄何事  
辛苦怨斜暉  
無盡今來古往多少春花秋月那更有  
危機與問牛山客何必淚沾衣

真德秀

字景元更字景希浦城人第慶元進士歷官翰林學士知制誥贈銀青光祿大夫謚文忠學

者稱西山先生

蝶戀花

紅梅

兩岸月橋花半吐  
紅透肌香暗把遊人誤  
盡道武陵溪上路  
不知迷入江南去  
先自冰霜真態度  
何事枝頭

點點胭脂污莫是東君嫌淡素問花花又嬌無語

趙汝愚

字子直漢王元佐七世孫家餘干舉進士第一累官光祿大夫右丞相贈太師追封沂國

公謚忠定

柳梢青

題豐樂樓

水月光中烟霞影裏湧出樓臺空外笙簫人間笑語身在蓬萊  
天香暗逐風回正十里荷花盡開買箇輕舟  
山南遊遍山北歸來

洪适

字景伯皓子中博學宏詞科累官尚書右僕射同中書門下平章事兼樞密使謚文惠有

好事近

別傳

柳岸碧漪深底事催人行色無計相留情話只別愁如  
織小蠻樊素兩傾城幾度醉狂客明日扁舟西去聽  
歌聲不得

生查子

桃疎蜨惜香柳困鶯銜絮日影過簾旌多少閒愁緒  
紅綻武陵溪綠暗章臺路春色似行人無意花間住

浣溪沙

餞范子  
芬行

整頓春衫欲跨鞍一杯相屬少開顏  
愁蛾不似舊時彎  
未見兩星添柳宿忍教三疊唱陽關  
相思空望會稽

山

虞美人

芭蕉滴滴窓前雨望斷江南路  
亂雲重疊幾多山不似  
倦飛鷗鳥便知還  
角聲更聽譙門弄  
夜夜思歸夢都  
江樓下水含漪孤負釣灘烟艇綠簑衣

吳儼

字益恭休寧人紹興二十七年進士淳熙初通判邕州已除知州兼廣南西路安撫都監以親老丐祠主管台州崇道館轉朝散郎致仕寶祐中追謚文肅有竹洲集詞一卷

滿庭芳

寄葉蔚宗

草滿池塘鶯啼楊柳燕忙知為泥融飄花流水竹外小  
橋通又是一春憔悴摘殘英遍遶芳叢長安遠平蕪盡  
處疊疊但雲峯西湖行樂處牙檣漾鷁錦帳翻虹想  
年時桃李應已成空欲寫相思寄與雲天濶難覓征鴻  
空凝想時時殘夢依約上陽鐘

浣溪沙

題星  
州寺

十里青山沂碧流，夕陽沙晚片帆收。  
重重烟樹出層樓。  
人去人歸芳草渡，鷗飛鷗沒白蘋洲。  
碧桐翠竹記曾遊。

遊

又

題餘干  
傳舍

畫楯朱欄繞碧山，平湖徙倚水雲寬。  
人家楊柳帶汀灣。  
目力已隨飛鳥盡，機心還逐白鷗閒。  
蕭蕭微雨晚來寒。

寒



減字木蘭花

中秋獨與  
靜之飲

碧梧秋老滿地琅玕紛不掃門掩黃昏惟有年時月照  
人淒涼滿眼肯作六年燈火伴莫說淒涼來歲如今  
又一方

楊萬里

字廷秀吉水人紹興中進士歷秘書監以寶  
文閣待制致仕進寶謨閣學士贈光祿大夫

謚文節有誠齋

集樂府一卷

好事近

月未到誠齋先到萬花川谷不是誠齋無月隔一庭脩

竹 如今纔是十三夜月色已如玉未是秋光奇絕看  
十五十六

李處全

字粹伯淳熙中侍御史有晦菴詞一卷

水調歌頭

送王景文

上馬趣携酒送客古朱方秋風斜日山際低草見牛羊  
酩酊不知更漏但見橫江白露清映月如霜平睨廣寒  
殿誰說路岐長 醉還醒時起舞念吾鄉江山爾爾回  
首千載幾興亡一笑書生事業誰笑管城居士不換碧

油幢好在中冷水擊節奏伊涼

菩薩蠻

杜鵑只管催歸去知渠教我歸何處故國淚生痕那堪  
枕上聞嚴裝吾已具泛宅吳中路弭楫喚東鄰江東  
日暮雲

張震

字東父號無隱居士益  
寧人孝宗朝為諫官

黃叔暘云無隱居士詞  
甚婉媚益富貴人語也

驀山溪

青梅如豆斷送春歸去小綠間長紅看幾處雲歌柳舞  
偎花識面對月共論心携素手采香遊踏遍西池路  
水邊朱戶曾記銷魂處小立背秋千空悵望娉婷韻度  
楊花撲面香糝一簾風情脉脉酒厭厭回首斜陽暮

蝶戀花

梅子初青春已暮芳草連雲綠遍西池路小院繡簾纔  
半舉銜泥紫燕雙飛去人在赤欄橋畔住不解傷心  
還解相思否清夢欲尋猶間阻紗窓一夜蕭蕭雨

羅

願

字端良號存齋歙縣人紹興中以蔭補承務郎監臨安新城稅歷鄂州守有鄂州小集

水調歌頭

中秋和施司諫

秋宇淨如水月鏡不安臺鬱孤高處張樂語笑脫塵埃  
簷外白毫千丈坐上銀河萬斛心境兩佳哉俯仰共清  
絕底處著風雷問天公邀月姊媿凡才婆娑人世羞  
見蓬鬢漾金壘來歲公歸何處照耀彩衣簪橐禁直且  
休催一曲庾江上千古繼韶陔

崔與之

字正子廣州人紹熙四年進士累官廣東經畧安撫使兼知廣州拜參知政事右丞相皆

力辭以觀文殿大學士致仕  
封南海郡公卒謚清獻有集

### 水調歌頭

萬里雲間成立馬，劍門關，亂山極目無際。直北是長安，人苦百年塗炭。鬼哭三邊，鋒鏑天道久應還。手寫留屯奏，炯炯寸心丹。對青燈，搔白髮，漏聲殘。老來勲業未就，妨却一身閒。梅嶺綠陰青子，蒲澗清泉白石，怪我舊盟寒。烽火平安夜，歸夢到家山。

劉克莊

字潛夫，莆田人。以蔭仕。淳熙中，賜同進士出身。官龍圖閣直學士。有後村別調一卷。

憶秦娥

遊人絕綠陰滿野芳菲歇芳菲歇養蠶天氣采茶時節  
枝頭杜宇啼成血陌頭楊柳吹成雪吹成雪淡烟疎  
雨江南三月

玉樓春

呈林  
節推

年年躍馬長安市客裏似家家似寄青錢喚酒日無何  
紅燭呼盧宵不寐易挑錦婦機中字難得玉人心下  
事男兒西北有神州莫灑水西橋畔淚

賀新郎

端午

思遠樓前路望平隄十里湖光畫船無數綠蓋盈盈紅  
粉面葉底荷花解語鬪巧結同心雙縷尚有經年離別  
恨一絲絲總是相思處相見也又重午清江舊事傳  
荆楚歎人情千載如新尚沉菰黍且盡尊前今日醉誰  
肯獨醒弔古汎幾盞菖蒲綠醕兩兩龍舟爭競渡奈珠  
簾暮捲西山雨看未足怎歸去

又

遊周氏  
花園



溪上收殘雨倚危欄薄綿乍脫日陰亭午鬧市不知春色處散在荒園廢墅漸小白長紅無數客子雖非河陽令也隨緣暫作鶯花主那可負甕中醕碧雲四合千巖暮恨匆匆余方有事子姑歸去趁取羣芳未搖落暇日提魚就煮歎激電光陰如許回首明年何處在問桃花尚記劉郎否公莫笑醉中語

滿江紅

落日登樓誰管領倦遊狂客待喚起滄浪漁父隔江吹

笛看水看山身尚健憂晴憂雨頭先白對暮雲不見美人來遙天碧  
山中鶴應相憶沙上鷺渾相識想石田  
茆屋草深三尺空有鬢如潘騎省斷無面見陶彭澤便  
倒傾海水浣衣塵難前滌

清平樂

贈維揚陳師文  
參議家舞姬

宮腰束素只怕能輕舉好築避風臺護取莫遣驚鴻飛  
去一團香玉溫柔笑顰俱有風流貪與蕭郎眉語不  
知舞錯伊州

摸魚兒

怪新來倚樓看鏡清狂渾不如舊暮雲千里傷心處

一作

色那更亂蟬疎柳凝望久愴故國百年陵闕誰回首功

名大謬歎采藥名山讀書精舍此計幾時就封侯事

久矣輸人妙手滄洲

一作扁舟

聊作漁叟高冠長劍都閒物

世上切身惟酒千載後君試看拔山扛鼎俱烏有英雄

骨朽問顧曲周郎而今還解來聽小詞否

長相思

朝有時暮有時潮水猶知日兩回人生長別離  
來有時去有時燕子猶知社後歸君行無定期

樓 鐸

字巨山淳熙中知江陰軍

浣溪沙

雙檣堂

夏半陽烏景最長小池不斷藕花香電影雷聲催急雨  
十分涼 芡剝明珠隨意嚼瓜分瓊玉趁時嘗雙檣堂  
深新釀好且傳觴

吳 琚

字居夫汴人憲聖皇后姪太寧郡王益之子歷尚書郎部使者直學士慶元中以鎮安節

度使守建康遷少保  
卒謚忠惠有雲壑集

酹江月

觀潮  
應制

玉虹遙挂望青山  
隱隱有如一抹忽覺天風吹海立好  
似春霆初發白馬凌空瓊鰲駕水  
日夜朝天闕飛龍舞  
鳳鬱葱環拱吳越  
此景天下應無東南形勝偉觀真  
奇絕好是吳兒飛彩幟蹴起一江  
秋雪黃屋天臨水犀  
雲擁看擊中流楫晚來波靜海門  
飛上明月

趙彥端

字德莊乾道淳熙間以直寶文  
閣知建寧府有介菴詞四卷

千秋歲

杏花風下獨立春寒夜微雨度疎星挂輝輝濃艷出嬋  
嬋繁枝亞朱檻倚輕羅醉裏添還卸寂寞情猶乍悵  
望驂鸞駕衣褪玉香欺麝一花揅一醉杯重憑誰把春  
去也重簾翠幕人如畫

謁金門

休相憶明夜遠如今日樓外綠烟村幕幕花飛如許急  
柳外晚來船集波底夕陽紅濕送盡去雲成獨立酒

醒愁又入

張正夫云德莊宗室之秀賦西湖謁金門云波底夕陽紅溼阜陵問誰詞答云彥端所作

上云我家裏人也  
會作此等語喜甚

青玉案

贈勉道  
琵琶人

當年萬里龍沙路載多少離愁去冷壓層簾雲不度  
芙蓉雙帶垂楊嬌髻弦索初調處花凝玉立東風暮曾  
記江邊麗人句異縣相逢能幾許多情誰料琵琶洲畔  
同醉清明雨

沙塞子

春水綠波南浦漸理棹行人欲去黯銷魂柳際輕烟花  
梢微雨長亭放箴無計住但芳草迷人去路忍回頭  
斷雲殘日長安何處

清平樂

席上  
贈人

桃根桃葉一樹芳相接春到江南三二月迷損東家蝴蝶  
殷勤踏取青陽風前花正低昂與我同心  
梔子報君百結丁香

點絳脣

途中逢  
管倅





顚顚天涯故人相遇情如故別離何處忍唱陽關句

我是行人更送行人去愁無據寒蟬鳴處回首斜陽暮

虞美人

斷蟬高柳斜陽處池閣絲絲雨綠檀珍簾卷新紅屈曲  
杏花蝴蝶小屏風春山疊疊秋波漫收拾殘鍼線又  
成嬌困倚檀郎無事更拋蓮子打鴛鴦

豆葉黃

粉牆丹檻柳絲中簾箔輕明花影重午醉醒來一面風

綠蔥蔥幾顆櫻桃葉底紅

管

鑑

字明仲有養拙堂詞一卷

生查子

天教百媚生賦得多情怨背整玉搔頭寬了黃金釧  
情隨歌意深故故回嬌盼不是不相知只為難相見

魏子敬

生查子

愁盈鏡裏山心疊琴中恨露濕玉蘭秋香伴金屏冷

雲歸月正圓鴈到人無信孤損鳳凰釵立盡梧桐影

劉與

伯云此詞題

道途壁甚工

甄龍友

字雲卿永嘉人紹興中進士官國子監簿

霜天曉角

題赤壁

峨眉仙客四海文章伯來向東坡遊戲人間世著不得

去國誰愛惜在天何處覓但見尊前人唱前赤壁後

赤壁

俞國寶

俞一作于臨川人淳熙間太學生有醒菴遺珠集

風入松

題酒肆

一春長費買花錢，日日醉湖邊。  
玉驄慣識西湖路，驕嘶過沽酒樓前。  
紅杏香中，歌舞綠楊影裏，秋千暖風十里。  
麗人天花壓鬢，雲偏畫船，載得春歸。  
去餘情付湖水，湖烟明日重扶殘。  
醉來尋陌上花鈿。

衛元卿

洋州人，領薦，不得志游山谷間。

謁金門

花過雨，又是一番紅。  
素燕子歸來愁不語，故巢無覓處。

誰在玉樓歌舞誰在玉關辛苦若使邊塵吹得去東風  
侯萬戶

李石

字知幾資陽人乾道中以薦任太學博士出為成都倅有方舟集

臨江仙

烟柳疎疎人悄悄畫樓風外吹笙倚欄聞喚小紅聲薰  
香臨欲睡玉漏已三更坐待不來來又去一方明月  
中庭粉牆東畔小橋橫起來花影下扇子撲流螢

漁家傲

贈鼎湖官伎

西去征鴻東去水幾重別恨千山裏夢繞綠窓書半紙  
何處是桃花溪畔人千里瘦玉倚香愁黛翠勸人須  
要人先醉問道明朝行也未猶自記燈前背立偷垂淚

張

鎡

字功甫號約齋西秦人官奉議郎有玉照堂詞一卷

鵲橋仙

菱

連汀接渚縈蒲帶藻萬鏡香浮光滿濕烟吹霽木蘭輕  
照波底紅嬌翠婉玉纖采來銀籠携去一曲山長水  
遠綵鴛雙慣貼人飛恨南浦離多夢短

蘭陵王

荷花

夢汀側朝靄依依弄色知何許  
湘女淡妝羽節飛來帶  
秋碧輕裙素綃織誰與明璫競飾  
無言處相倚遡迴應  
有柔情正堆積  
當年駐香鷁記草媚羅裙波映文席  
闕

斜陽返照暮

雨濕愛天際涼入  
愁寂念疇昔謾太華峰頭幽夢尋  
覓而今兩鬢如花白但一線才思半星心力  
新詞奇句  
便做有怎道得

滿庭芳

促織

月洗高梧露溥幽草寶釵樓外秋深土花沿翠螢火墜  
牆陰靜聽寒聲斷續微韻轉淒咽悲沉爭求侶殷勤勸  
織促破曉機心兒時曾記得呼燈灌穴斂步隨音任  
滿身花影猶自追尋携向畫堂試鬪亭臺小籠巧裝金  
今休說從渠牀下涼夜聽孤吟

杜 旟

字伯高號橋齋金華人呂成公  
門下士與弟四人並有名譽

陳同甫云伯高奔風逸足而鳴以和鸞仲高  
麗句晏叔原不得擅美叔高戈矛森立有吞



虎食牛之氣左右輝映匪獨一門之盛可謂一時之豪葉正則贈幼高云杜子五兄弟

詞林俱上頭

酹江月

石頭城

江山如此是天開萬古東南王氣一自髯孫橫短策坐  
使英雄鵲起玉樹聲銷金蓮影散多少傷心事千年遼  
鶴併疑城郭非是當日萬駟雲屯潮生潮落處石頭  
孤峙人笑褚淵今齒冷只有袁公不死斜日荒烟神州  
何在欲墮新亭淚元龍老矣世間何限餘子

摸魚兒

湖上

放扁舟萬山環處平鋪碧浪千頃仙人憐我征塵久借  
與夢遊清枕風乍靜望兩岸羣峰倒浸玻璃影樓臺相  
映更日薄烟輕荷花似醉飛鳥墮寒鏡中都內羅綺  
千街萬井天教此地幽勝仇池仙伯今何在隄柳幾眠  
還醒君試問此意只今更有何人領功名未竟待學取  
鷗夷仍携西子來動五湖興

驀山溪

春風如客可是繁華主紅紫未全開早綠遍江南千樹  
一番新火多少倦遊人纖腰柳不知愁猶作風前舞  
小闌干外兩兩幽禽語問我不歸家有佳人天寒日暮  
老來心事惟只有春知江頭路帶春來更帶春歸去

劉 儼

一云名仙掄字叔儼  
廬陵人有招山集

黃叔暘云叔儼有招山詩  
集樂章尤為人所膾炙

菩薩蠻

海棠

東風去了秦樓畔一川烟草無人管芳樹雨初晴黃鸝

三兩聲 海棠花已謝春事無多也只有牡丹時知他  
歸不歸

念奴嬌

送張明之  
赴京西幕

餘艤東下望西江千里蒼茫烟水試問襄州何處是雉  
堞連雲天際叔子殘碑卧龍陳迹遺恨斜陽裏後來人  
物如君瓌偉能幾其肯為我來耶河陽下士正是强  
人意勿謂時平無事也便以言兵為諱眼底山河樓頭  
鼓角都是英雄淚功名機會要須閒暇先備

又

長沙趙帥

席上作

西風何事為行人掃蕩煩襟如洗熏漲蒸瀾都捲盡一  
片瀟湘清泚酒病驚秋詩愁入鬢對影人千里楚宮故  
事一時分付流水江上買取扁舟排雲湧浪直過金  
沙尾歸去江南丘壑處不用重尋月姊風露杯深芙蓉  
裳冷笑傲烟霞裏草廬如舊卧龍知為誰起

訴衷情

征衣薄薄不禁風長日雨絲中又是一年春事花信到

梧桐 雲漠漠水溶溶去匆匆客懷今夜家在江西身  
在江東

岳

珂

字肅之號倦翁飛孫管内勸農使知嘉興府  
歷戶部侍郎淮東總領兼制置使有玉楮集

祝英臺近

北固亭

淡烟橫層霧斂勝槩分雄占月下鳴榔風急怒濤颭關  
河無限清愁不堪臨鑑正雙鬢秋風塵染 謾登覽極  
目萬里沙場事業頻看劒古往今來南北限天塹倚樓  
休弄新聲重城門掩歷歷數西州更點

程

琬

字懷古休寧人紹熙四年進士累官寶文閣學士知福州兼福建安撫使封新安郡侯以

端明殿學士致仕卒贈特進少師有沼水集詞一卷

念奴嬌

憶先廬春山之勝

歸來一笑尚看看  
趣得人間寒食阿壽牽衣仍問我雙  
鬢新來添白忍見庭前去年芳草依舊青青色  
西湖雨後綠波兩岸平拍  
天教斷送流年三之一矣又是成  
疎隔燕子春寒渾未到誰說江南消息玉樹熏香永桃  
翻浪好箇真消息  
這回歸去松風深處橫笛

王千秋

字錫老東平人有審齋詞一卷

賀新郎

石城  
弔古

弔古城頭去正高秋霜晴木落路通洲渚欲問紫髯分  
鼎事只有荒祠烟樹巫覡去久無簫鼓霸業荒涼遺堞  
墜但蒼崖日闕征帆渡興興廢幾今古夕陽細草空  
凝竚試追思當時子敬用心良誤要約劉郎銅雀醉底  
事遽爭荆楚遂但見蜀吳烽舉致使五官伸脚睡喚諸  
兒畫取長陵土遺此恨欲誰語



程先

字傳之休寧人父官團練以偏師禦金人於池州殉節死當錄其嗣固讓不受隱居東山

遣其子永奇師事晦菴即語錄所稱程次卿是也

鎖窓寒

有感

雨洗紅塵雲迷翠麓小車難去淒涼感慨未有今年春  
暮想曲江水邊麗人影沉香歇誰為主但免葵燕麥風  
前搖蕩徑花成土空被多情苦嘉會難逢少年幾許  
紛紛沸鼎負了青陽百五待何時重覩太平典衣貰酒  
相爾汝算蘭亭有此歡娛又却悲今古

蘇

洞

字名叟山陰人有冷然閣集

雨中花

懷劉改之

十載尊前放歌起舞人間酒戶詩流盡期君凌厲羽翮  
高秋世事幾如人意儒冠還負身謀歎天生李廣才氣  
無雙不得封侯榆關萬里一去飄然片雲甚處神州  
應悵望家人父子重見無由隴水寂寥傳恨淮山宛轉  
供愁這回休也燕鴻南北長隔英游

劉圻父

字子寰號篁嶢游朱文公之門有麻沙集

花發沁園春

呈史  
滄洲

換譜伊涼選歌燕趙一番樂事重起花新笑靨柳軟纖  
腰齊楚衆芳園裏年年佳會長是傍清明天氣正魏紫  
衣染天香蜀紅妝破春睡一簇猩羅鳳翠遍東園西  
城點檢芳事銓齋吏散畫館人稀幾闌管絃清脫人生  
適意流轉共風光遊戲到遇景取次成歡怎教良夜休  
醉

詞綜卷十四

欽定四庫全書薈要卷二萬八百十三

集部

詞綜卷十五

翰林院檢討朱彝尊編

宋詞六十六首

姜夔

二十首

陸游

十五首

陳亮

三首

劉過

九首

楊炎

六首

張輯

十一首

姜夔

字堯章鄱陽人流寓吳興有白石詞五卷

范石湖云白石有裁雲縫月之妙手敲金戛玉之奇聲趙子固云白石詞家之申韓也

黃叔暘云白石詞極精妙不減清真其高處有美成所不能及沈伯時云白石清勁知音亦未免有生硬處張叔夏云姜白石如野雲孤飛去留無迹又云白石詞不惟清

虛且又騷雅讀之

使人神觀飛越

# 探春慢

過雪溪別鄭次臯諸君

衰草愁烟亂鴉送目飛沙迴旋平野拂雪金鞭欺寒茸  
帽還記章臺走馬誰念漂零久謾贏得幽懷難寫故人  
青盼相逢小窓間共情話長恨離多會少重訪問竹  
西珠淚盈把鴈磧沙平漁汀人散老去不堪遊冶無奈

苔溪月又喚我扁舟東下甚日歸來梅花零亂春夜

一萼紅

人日登長沙定王臺

古城陰有官梅幾許紅萼未宜簪池面冰膠牆腰雪老  
雲意還又沉沉翠藤共間穿徑竹漸笑語驚起卧沙禽  
野老林泉故王臺榭呼喚登臨南去北來何事蕩湘  
雲楚水目極傷心朱戶黏雞金盤簇燕空歎時序侵尋  
記曾共西樓雅集想垂柳還裊萬絲金待得歸鞍到時  
只怕春深

揚州慢

淳熙丙申至  
日過揚州

淮左名都竹西佳處解鞍少駐初程過春風十里盡薺  
麥青青自邊馬窺江去後廢池喬木猶厭言兵漸黃昏  
清角吹寒都在空城杜郎俊賞算如今重到須驚縱  
豈尅詞工青樓夢好難賦深情二十四橋仍在波心蕩  
冷月無聲念橋邊紅藥年年知為誰生

點絳脣

吳松

燕鴈無心太湖西畔隨雲去數峯清苦商畧黃昏雨

第四橋邊擬共天隨住今何許凭欄懷古殘柳參差舞

暗香

石湖  
詠梅

舊時月色算幾番照我梅邊吹笛喚起玉人不管清寒  
與攀摘何遜而今漸老都忘却春風詞筆但怪得竹外  
疎花香冷入瑤席江國正寂寂歎寄與路遙夜雪初  
積翠尊易泣紅萼無言耿相憶長記曾攜手處千樹壓  
西湖寒碧又片片吹盡也幾時見得

疎影

前題



苔枝綴玉有翠禽小小枝上同宿客裏相逢籬角黃昏  
無言自倚修竹昭君不慣胡沙遠但暗憶江南江北想  
珮環月下歸來化作此花幽獨猶記深宮舊事那人

正睡裏飛近蛾綠莫似春風不管盈盈早與安排金屋  
還教一片隨波去又却怨玉龍哀曲等恁時重覓幽香

已入小窓橫幅

張叔夏云暗香疎影二曲前  
無古人後無來者真為絕唱

長亭怨慢

漸吹盡枝頭香絮是處人家綠深門戶遠浦縈迴暮帆

零亂向何許。閱人多矣，誰得似長亭樹。樹若有情時，不  
會得、青青如此。日暮望高城不見，只見亂山無數。韋  
郎去也，怎忘得、玉環分付。第一是早早歸來，怕紅萼無  
人為主。算只有、并刀難剪離愁千縷。

齊天樂

蟋蟀

庾郎先自吟愁賦。淒淒更聞私語。露濕銅鋪，苔侵石井，  
都是曾聽伊處。哀音似訴。正思婦無眠起，尋機杼曲曲。  
屏山夜涼獨自甚。情緒西窓又吹暗雨。為誰頻斷續。

相和砧杵候館吟秋離宮弔月別有傷心無數  
幽詩謾與笑離落呼燈世間兒女寫入琴絲一  
聲聲更苦

張叔夏云

全章精粹所詠瞭然在目且不留滯於物

念奴嬌

荷花

開紅一舸記年時常與鴛鴦為侶三十六陂人未到水  
佩風裳無數翠葉吹涼玉容消酒更灑菰蒲雨嫣然搖  
動冷香飛上詩句日暮青蓋亭亭情人不見爭忍凌  
波去只恐舞衣寒易落愁入西風南浦高柳垂陰老魚

吹浪留我花間住田田多少幾回沙際歸路

湘月

即念奴嬌之  
隔指聲也

五湖舊約問經年底事長負清景暝入西山漸喚我一  
葉夷猶乘興倦網都收歸禽時度月上汀洲冷中流客  
與畫橈不點清鏡誰解喚起湘靈烟鬟霧鬢理哀絃  
鴻陣玉塵談玄歎坐客多少風流名勝暗柳蕭蕭飛星  
冉冉夜久知秋信鱸魚應好舊家樂事誰省

淡黃柳

合肥

空城曉

一作畫

角吹入垂楊陌馬上單衣寒側側看盡鶯

黃嫩綠都是江南舊相識正岑寂明朝又寒食強携

酒小橋宅怕梨花落盡成秋色燕燕飛來問春何在惟有池塘自碧

側犯

芍藥

恨春易去甚春却向揚州住微雨正繭栗梢頭弄詩句紅橋二十四總是行雲處無語漸半脫宮衣笑相顧

金壺細葉千朵圍歌舞誰念我鬢成絲來此共尊俎後

日西園綠陰無數寂寞劉郎自脩花譜

惜紅衣

荷花

枕簟邀涼琴書換日睡餘無力細灑冰泉并刀破甘碧  
牆頭喚酒誰問訊城南詩客岑寂高樹晚蟬說西風消  
息虹梁水陌魚浪吹香紅衣半狼籍維舟試望故國  
渺天北可惜渚邊沙外不共美人遊歷問甚時同賦三  
十六陂秋色

琵琶仙

吳興

雙槳來時有人似舊曲桃根桃葉歌扇輕約飛花蛾眉  
正奇絕春漸遠汀洲自綠更添了幾聲啼鴂十里揚州  
三生杜牧前事休說又還是宮燭分烟奈愁裏匆匆  
換時節都把一襟芳思與空階榆莢千萬縷藏鴉細柳  
為玉尊起舞迴雪想見西出陽關故人初別

淒涼犯

合肥  
秋夕

綠楊巷陌西風起邊城一片離索馬嘶漸遠人歸甚處  
戍樓吹角情懷正惡更哀草寒烟淡薄似當時將軍部

曲迤邐度沙漠 追念西湖上小舫携歌晚花行樂舊  
游在否想如今翠凋紅落謾寫羊裙等新鴈來時繫著  
怕匆匆不肯寄與悞後約

翠樓吟

武昌安遠樓成

月冷龍沙塵清虎落今年漢酺初賜新翻邊地曲聽氍  
幕元戎歌吹層樓高峙看檻曲縈紅簷牙飛翠人姝麗  
粉香吹下夜寒風細此地宜有神仙擁素雲黃鶴與  
君游戲玉梯凝望久歎芳草萋萋千里天涯情味仗酒



被清愁花消英氣西山外晚來還捲一簾秋霽

法曲獻仙音

張彥遠  
官舍

虛閣籠寒小簾通月暮色偏宜高處樹隔離宮水平馳  
道湖山盡入尊俎奈楚客淹留久砧聲帶愁去屢回  
顧過秋風未成歸計誰念我重見冷楓紅舞喚起淡妝  
人問逋仙今在何許象筆鸞箋甚而今不道秀句怕平  
生幽恨化作沙邊烟雨

眉嫵

戲張  
仲遠

看垂楊連苑杜若吹沙愁損未歸眼信馬青樓去重簾  
下娉婷人妙飛燕翠尊共款聽艷歌郎意先感便携手  
月地雲堦裏愛良夜微煖無限風流疎散有暗藏弓  
履偷寄香翰明月聞津鼓湘江上催人還解春纜亂紅  
萬點悵斷魂烟水遙遠又爭似相携乘一舸鎮長見

石湖仙

寄石湖處士

松江烟浦是千古三高游衍佳處須信石湖仙似鷗夷  
翩然引去浮雲安在我自愛綠香紅嫵容與看世間幾

度今古 盧溝舊曾駐馬為黃花間吟秀句見說邊頭  
也學綸巾歌羽玉友金蕉玉人金縷緩移箏柱聞好語  
明年定在槐府

解連環

玉鞍重倚却沉吟未上又縈離思為大喬能撥春風小  
喬妙携箏鴈啼秋水柳怯雲鬆更何必十分梳洗道郎  
携羽扇那日隔簾半面曾記 西窓夜涼雨霽歎幽歡  
未足何事輕棄問後約空指薔薇算如此溪山甚時重

至水驛燈昏又見在曲屏近底念惟有夜來皓月照伊  
自睡

八歸

湖中送  
胡德華

芳蓮墜粉疎桐吹綠庭院暗雨乍歇無端抱影銷魂處  
還見篠牆螢暗蘚階蛩切送客重尋西去路問水面琵琶  
誰撥最可惜一片江山總付與啼鴂長恨相從未  
款而今何事又對西風離別渚寒烟淡棹移人遠縹緲  
行舟如葉想文君望久倚竹愁生步羅襪歸來後翠尊

雙飲下了珠簾玲瓏閒看月

玲瓏四犯

越中  
歲暮

疊鼓夜寒垂燈春淺匆匆時事如許倦遊歡意少俛仰  
悲今古江淹又吟恨賦記當時送君南浦萬里乾坤百  
年身世惟有此情苦揚州柳垂官路有輕盈換馬端  
正窺戶酒醒明月下夢逐潮聲去文章信美知何用謾  
盡贏得天涯羈旅教說與春來要尋花伴侶

陸游

字務觀山陰人以蔭補登仕郎隆興初賜進士出身范成大帥蜀為參議官人譏其頽放

因自號放翁嘉泰初詔同修國史  
升寶章閣待制有劍南集詞二卷

劉潛夫云放翁稼軒一掃纖艷不事斧  
鑿高則高矣但時時掉書袋要是一癖

## 南鄉子

歸夢寄吳檣水驛江程去路長想見芳洲初繫纜斜陽  
烟樹參差認武昌  
愁鬢點新霜曾是朝衣惹御香重  
到故鄉交舊少淒涼却恐他鄉勝故鄉

## 好事近

湓口放船歸薄暮散花洲宿兩岸白蘋紅蓼映一簑新

綠有沽酒處便為家菱芡四時足明日又乘風去任  
江南江北

朝中措

怕歌愁舞懶逢迎妝晚託春醒總是向人深處當時枉  
道無情關心近日啼紅密訴剪綠深盟杏館花陰恨  
淺畫堂銀燭嫌明

又

鼕鼕儺鼓餞流年燭焰動金船綵燕難尋前夢酥花空

點春妍 文園謝病蘭成久  
旅回首淒然明月梅山笛  
夜和風禹廟鶯天

水龍吟

春日游  
摩訶池

摩訶池上追游路紅綠參差春晚韶光妍媚海棠如醉  
桃花欲暖挑菜初間禁烟將近一城絲管看金鞍爭道  
香車飛蓋爭先占新亭館惆悵年華暗換黯銷魂雨  
收雲散鏡奩掩月釵梁拆鳳秦箏斜鴈身在天涯亂山  
孤壘危樓飛觀歎春來只有楊花和恨向東風滿



采桑子

寶釵樓上妝梳晚，懶上秋千。閒撥沉烟，金縷衣寬睡髻偏。  
鱗鴻不寄遼東信，又是經年。彈淚花前，愁入春風十四絃。

漁家傲

寄仲高

東望山陰何處是，往來一萬三千里。寫得家書空滿紙。  
流清淚，書回已是明年事。寄語紅橋橋下水，扁舟何日尋兄弟。  
行徧天涯真老矣。愁無寐，鬢絲幾縷茶烟裏。

極相思

江頭疎雨輕烟寒食落花天翻紅墜素殘霞暗錦一段  
淒然惆悵東君堪恨處也不念冷落尊前那堪更看  
漫空相趁柳絮榆錢

雙頭蓮

呈范至能待制

華髮星星驚壯志成虛此身如寄蕭條病驥向暗裏消  
盡當年豪氣夢斷故國山川隔重重烟水身萬里舊社  
凋零青門俊遊誰記盡道錦里繁華歎官閒晝永柴

荆添睡清愁自醉念此際付與何人心事縱有楚柁吳  
檣知何時東逝空悵望鱸美菰香秋風又起

鵲橋仙

華燈縱博雕鞍馳射誰記當年豪舉酒徒一半取封侯  
獨去作江邊漁父輕舟八尺低篷三扇占斷蘋洲烟  
雨鏡湖元自屬閒人又何必官家賜與

又

夜聞杜鵑

茅簷人靜蓬窓燈暗春晚連江風雨林鶯巢燕總無聲

但月夜常啼杜宇 催成清淚驚殘孤夢又揀深枝飛  
去故山猶自不堪聽況半世飄然羈旅

感皇恩

小閣倚秋空下臨江渚漠漠孤雲未成雨數聲新鴈回  
首杜陵何處壯心空萬里人誰許 黃閣紫樞築壇開  
府莫怕功名欠人做如今熟計只有故鄉歸路石帆山  
脚下菱三畝

沁園春

三榮橫谿  
閣小宴

粉破梅梢綠動萱叢春意已深漸珠簾低捲筇枝微步  
冰開躍鯉林暖鳴禽荔子扶疎竹枝哀怨濁酒一尊和  
淚斟凭欄久歎山川冉冉歲月駸駸 當時豈料如今  
謾一事無成霜鬢侵看故人強半沙堤黃閣魚懸帶玉  
貂映蟬金許國雖堅朝天無路萬里淒涼誰寄音東風  
裏有灞橋烟柳知我歸心

又

一別秦樓轉眼新春又近放燈憶盈盈倩笑纖纖柔握

雪香花語玉暖酥凝念遠愁腸傷春病思自怪平生殊  
未曾君知否漸香消蜀錦淚漬吳綾難求繫日長繩  
況倦客飄零少舊朋但江郊鴈起漁村笛遠寒釭委燼  
孤硯生水水繞山圍烟昏雲慘縱有高臺常怯登消魂  
處是魚箋不到蘭夢無憑

真珠簾

山村水館參差路感羈游正似殘春風絮掠地穿簾知  
是竟歸何處鏡裏新霜空自憫問幾時鸞臺鰲署遲暮

謾憑高懷遠書空獨語 自古儒冠多誤悔當年早不  
扁舟歸去醉下白蘋洲看夕陽鷗鷺菰菜鱸魚都棄了  
只換得青衫塵土休顧早收身江上一簑烟雨

陳亮

字同父永康人淳熙中詣闕上書孝宗欲官  
之亟渡江歸至光宗策進士擢第一授僉書  
建康府判官廳公事未至官而卒  
端平初謚文毅有龍川集詞一卷

水龍吟

鬧花深處層樓畫簾半捲東風軟春歸翠陌平莎茸嫩  
垂楊金淺遲日催花淡雲閣雨輕寒輕暖恨芳菲世界

游人未賞都付與鶯和燕  
寂寞憑高念遠向南樓一  
聲歸鴈金釵鬪草青絲勒馬風流雲散羅綬分香翠綃  
封淚幾多幽怨正銷魂又是疎烟淡月子規聲斷

洞仙歌

秋雨追次  
李元膺韻

瑣窓秋暮夢高唐人因獨立西風萬千恨又簷花落處  
滴碎空堦芙蓉怨無限秋容老盡枯荷催欲折多少  
離聲鎖斷天涯訴幽悶似蓬山去後方士來時揮粉淚  
點點梨花香潤斷送得人間夜霖鈴更落葉梧桐孤燈



成暈

虞美人

東風蕩颺輕雲縷時送瀟瀟雨水邊臺榭燕新歸一點  
香泥濕帶落花飛 海棠糝徑鋪香繡依舊成春瘦黃  
昏庭院柳啼鴉記得那人和月折梨花

劉過

字改之襄陽人一云太和人有龍洲詞一卷

黃叔暘云改之稼軒之客詞多壯語蓋學稼軒者也 陶九成云改之造詞贍逸有思致

沁園春二首  
尤纖麗可愛

賀新郎

贈鄉人  
朱唐卿

多病劉郎瘦最傷心天寒歲晚客他鄉久大舸翩翩何  
許至元是高陽舊友便一笑相歡攜手與問武昌城下  
月又何如楊子江頭柳追往事兩眉皺 燭花自剪明  
如晝喚青蛾小紅樓上殷勤勸酒昵昵琵琶恩怨語春  
筍輕籠翠袖看舞徹金釵微溜若見故鄉吾父老道長  
安市上強如舊重會面幾時又

又

去年秋余試牒四明賦贈老娼至今天下與  
禁中皆歌之江西人來以為鄧南秀詞非也

老去相如倦，向文君說似而今，怎生消遣。衣袂京塵曾染處，空有香紅尚軟。料彼此魂銷腸斷。一枕新涼眠客舍，聽梧桐疎雨秋風顫。燈暈冷，記初見。樓低不放珠簾捲。晚妝殘，翠蛾狼籍，淚痕流臉。人道愁來須殢酒，無奈愁深酒淺。但託意焦琴，紉扇、莫鼓琵琶江上。曲怕荻花楓葉，俱淒怨。雲萬疊，寸心遠。

又  
西湖

睡覺啼鶯曉，醉西湖兩峯日日買花簪帽去盡酒徒無。

人問惟有玉山自倒任拍手兒童爭笑一舸乘風翩然  
去避魚龍不見波聲悄歌韻遠喚蘇小 神仙路遠蓬  
萊島紫雲深參差禁樹有烟花遶人世紅塵西障日百  
計不如歸好付樂事與他年少費盡柳金梨雪句問沉  
香亭北何時召心未愜鬢先老

清平樂

新來塞北傳到真消息赤地居民無一粒更五單于爭  
立 維師尚父鷹揚熊羆百萬堂堂看取黃金假鉞歸

來異姓真王

唐多令

重過武昌

蘆葉滿汀洲，寒沙帶淺流。二十年重過南樓。柳下繫船猶未穩，能幾日，又中秋。黃鶴斷磯頭，故人曾到否。舊江山，渾是新愁。欲買桂花同載酒，終不似、少年遊。

又  
梅

解纜蓼花灣，好風吹去帆。二十年重過新灘。洛浦凌波人去後，空夢繞，翠屏間。飛霧濕征衫，蒼蒼烟樹寒。望

星河低處長安綺陌紅樓應笑我為花事過江南

沁園春

美人足

洛浦凌波為誰微步輕生暗塵記踏花芳徑亂紅不損  
步苔幽砌嫩綠無痕襯玉羅慳銷金樣窄載不起盈盈  
一段春嬉游倦笑教人款捻微褪些跟 有時自度歌  
勻悄不覺微尖點拍頻憶金蓮移換文鴛得侶繡茵催  
袞舞鳳輕分懊恨深遮牽情半露出沒風前烟縷裙知  
何似似一鉤新月淺碧籠雲

又

美人  
指甲

銷薄春冰碾輕寒玉漸長漸灣見鳳鞋泥污偎人強別  
龍涎香斷撥火輕翻學撫瑤琴時時欲剪更掬水魚鱗  
波底寒纖柔處試摘花香滿鏤棗成斑時將粉淚偷  
彈記綰玉曾教柳傳看算恩情相著搔便玉體歸期暗  
訴劃遍闌干每到相思沉吟靜處斜倚朱脣皓齒間風  
流甚把仙郎暗掐莫放春閒

行香子

山水  
扇面

佛寺雲邊茅舍山前樹陰中酒旆低懸峯巒空翠溪水  
清漣只欠桃花欠沙鳥欠漁船無限風烟景趣天然  
最宜他隱者盤旋何人村墅若個林泉恰似敬湖似方  
口似斜川

楊炎

號止濟翁廬陵人  
有西樵語業一卷

鵲橋仙

思歸時節乍寒天氣總是離人愁緒夜來無奈被西風  
更吹做一簾秋雨征衫拂淚闌干倚醉羞對黃花無



語寄書除是鴈來時又只恐書成鴈去

蝶戀花

別范南伯

離恨做成春夜雨添得春江剗地東流去弱柳繫船都  
不住為君愁絕聽鳴榔君到南徐芳草渡想得尋春  
依舊當年路後夜獨憐回首處亂山遮莫無重數

又

稼軒坐間作首句  
用丘六書中語

點檢笙歌多釀酒不放東風獨自迷楊柳院院翠陰停  
永晝曲欄隨處堪垂手昨日解醒今夕又消得情懷

長被春僝僽門外馬嘶人去後亂紅不管花消瘦

秦樓月

東風寂垂楊舞困春無力春無力落紅不管杏花狼籍  
斷腸芳草萋萋碧新來怪底相思極相思極冷烟池  
館又將寒食

水調歌頭

把酒對斜日無語問西風胭脂何事都做顏色染芙蓉  
放眼暮江千頃中有離愁萬斛無處落征鴻天在闌干

角人倚醉醒中 千萬里江南北浙西東吾生如寄尚  
想三徑菊花叢誰是中州豪傑借我五湖舟楫去作釣  
魚翁故國且回首此意莫匆匆

滿江紅

筆染相思暗題盡朱門白壁動離思春生遠岸烟銷殘  
日楊柳結成羅帶恨海棠染就胭脂色想深情幽怨繡  
屏間雙瀾瀾春水綠春山碧花有恨人無力對一奩  
愁思十分孤寂寸寸錦腸渾欲斷盈盈玉淚應偷滴倩

東風吹鴈過江南傳消息

張

輯

字宗瑞鄱陽人有東澤綺語債二卷

朱湛盧云東澤得詩法於姜堯章世謂謫仙復作不知其又能詞也

疎簾淡月

寓桂枝香

梧桐雨細漸滴做秋聲被風驚碎潤逼衣篝線裊蕙爐  
沉水悠悠歲月天涯醉一分秋一分憔悴紫簫吹斷素  
箋恨切夜寒鴻起又何苦淒涼客裏負草堂春綠竹  
溪空翠落葉西風吹老幾番塵世從前譜盡江湖味聽

商歌歸興千里露侵宿酒疎簾淡月照人無寐

如此江山

寓齊天樂

西風揚子江頭路扁舟雨晴呼渡岸隔瓜洲津橫蒜石  
搖盡波聲千古詩人一去但對峙金焦斷磯青樹欲下  
斜陽長淮渺渺正愁予中流笑與客語把貂裘為浣  
半生塵土品水烹茶看碑憶鶴恍似舊曾游處聊憑陸  
謂問八極神游肯重來否如此江山更蒼烟白鷺

釣船笛

寓好事近

載酒岳陽樓。秋入洞庭深碧極。目水天無際。正白蘋風急。月明不見宿鷗驚。醉把玉欄拍。誰謂百年心事。恰釣船橫笛。

月當窓

寓霜天  
曉角

看朱成碧。曾醉梅花側。相遇匆匆相別。又爭似不相識。南北千里隔。幾時重見得。最苦子規啼處。一片月當窓白。

山漸青

寓長  
相思

山無情水無情楊柳飛花春雨晴征衫長短亭  
擬行

行重行行行

一作吟

到江南第幾程江南山漸青

碧雲深

寫憶秦娥

風淒淒井欄絡緯驚秋啼驚秋啼涼侵好夢月正樓西  
卷簾望月知心誰關河空隔長相思長相思碧雲暮  
合有美人兮

南浦月

寫點絳脣賦瀟湘漁父

來剪尊絲江頭一陣鳴簾雨孤篷歸路吹得蘋風暮

短髮蕭蕭笑與沙鷗語休歸去玉龍嘶處邀月過南浦

沙頭雨

寓點絳脣

帶醉歸時月華猶在吹簫處曉愁情緒忘却匆匆語

客裏風霜詩鬢空如許江南去岸花迎櫓遙隔沙頭雨

花自落

寓詞金門

春寂寞簾低蕙爐烟薄聽盡歸鴻書怎託相思天一角

象筆鸞箋閑却秀句與誰商畧睡起愁懷何處著無

風花自落



垂楊碧

寓謁金門


花半濕睡起一窓晴色千里江南真咫尺醉中歸夢直  
前度蘭舟送客雙鯉沉沉消息樓外垂楊如此碧問  
春來幾日

闌干萬里心

寓憶王孫

小樓柳色未春深湘月牽情入苦吟翠袖風前冷不禁  
怕登臨幾曲闌干萬里心

詞綜卷十五



總校官庶吉士臣張能照  
校對官中書臣潘庭筠  
謄錄監生臣馮曰琮

欽定四庫全書薈要

集部  
詞綜卷十六

七

詳校官編修臣繆晉



欽定四庫全書  
會要卷二萬八百十四

集部

詞綜卷十六

翰林院檢討朱彝尊編

宋詞六十一首

謝懋

四首

黃機

十二首

劉鎮

四首

危稹

一首

吳禮之

三首

劉光祖

三首

閻丘次果

一首

馬莊父

三首

李洪

一首

李泳

二首



李漳一首

李浙一首

鄭域一首

戴復古一首

黃銖二首

嚴仁五首

易祓一首

趙善扛四首

毛开四首

王壘一首

曹幽一首

洪咨夔一首

趙汝迂一首

章穎一首

郭應祥一首

陸子逸一首

謝

懋

字勉仲有靜寄居士樂章二卷

黃叔暘云居士樂章二卷吳坦伯明為序稱其片言隻字夏玉鏗金蘊藉風流為世所貴

石州引

日脚斜明秋色半陰人意淒楚飛雲特地凝愁做弄晚  
來微雨誰家別院舞困幾葉霜紅西風送客聞砧杵鞭  
馬出都門正潮平洲渚無語匆匆短棹滿載離愁片  
帆高舉京洛紅塵因念幾年羈旅淺顰輕笑風月逢迎  
別來誰畫雙眉嫵回首一銷凝望歸鴻容與

洞仙歌

春雨

愁邊雨細漠漠天如醉  
搖颺游絲晚風外  
釀輕寒和暝色  
花柳難勝春自老  
誰管啼紅斂翠  
闌情潛入夜斜  
濕簾櫳幾處挑燈耿  
無寐  
念陽臺當日事  
好伴雲來因箇甚  
不入襄王夢裏  
便添起寒潮捲  
長江又恐是離人  
斷腸清淚

念奴嬌

中秋呈徐叔至

霽天湛碧正新涼  
風露冰壺清徹  
河漢無聲光練練  
湧

出銀蟾孤絕岩桂香飄井梧影轉冷浸宮袍潔西廂往  
事一簾輕夢悽切腸斷楚峽雲歸尊前無緒知有愁  
如髮此夕姮娥應也恨冷落瓊樓金闕禁漏迢迢邊鴻  
杳杳幽意憑誰決闌干星斗落梅三弄初闕

憶少年

寒食

池塘綠遍王孫芳草依依斜日遊絲捲晴晝繫東風無  
力蜨趨幽香蜂釀蜜秋千外卧紅堆碧心情費消遣  
更梨花寒食



黃

機

字幾仲一云字幾叔東陽人有竹齋詩餘一卷

乳燕飛

次岳總幹韻

擊碎珊瑚樹為留春怕春欲去駛如風雨春不留兮君  
休問付與流鶯自語但莫賦綠波南浦世上功名花梢  
露政何如一笑翻金縷繫白日莫教暮蒼頭引馬城  
西路趁池亭荻芽尚短梅心未苦小雨欲晴晴不定漠  
漠雪飛輕絮算行樂春來幾度鞭影不搖鞍小據過橫  
塘試把前山數雙白鷺忽飛去

摸魚兒

惜春歸送春惟有亂紅撲簌如雨亂紅也怨春狼籍揜  
得淚痕無數腸斷處更喚起羣鴉催發長亭路征鞍難  
駐但脉脉含顰嗔人底事剛愛逐春去 闌干凭芳草  
斜陽凝竚愁連滿眼烟樹髮鬆不理金釵溜鸞鏡一奩  
香霧花誰主悵玉容寂寞春知否單衣嬾御任門外東  
風流鶯聲裏盡日攪飛絮

喜遷鶯

香風  
亭上

平湖百畝種滿湖蓮葉繞堤楊柳冉冉波光輝輝烟影  
空翠濕霑襟袖靜愜鄰雞啼午暝逼沙鷗眠晝西園路  
更紅塵不斷蜨酣蜂瘦知否堪畫處野薺蕪菁胷地  
鋪茵繡桃李陰邊桑麻叢裏斜矗酒帘誇酒竹寺小依  
山趾茅店平窺津口春又晚正香風有客倚欄搔首

水龍吟

晴江滾滾東流為誰流得新愁去新愁都在長亭望際  
扁舟行處歌罷翻香夢回呵酒別來無據恨荼蘼吹盡

櫻桃過了便只恁成孤負  
須信情鍾易感數良辰佳  
期應誤才高自歎彩雲空詠  
凌波謾賦團扇塵生吟箋  
淚漬一觴慵舉但叮嚀雙燕  
明年還解寄平安否

鵲橋仙

一番雨過江頭綠漲催喚扁舟解去  
重來言語縱堪憑  
一作是  
怎得似而今且住  
一作寬  
陽關聲斷同心未綰  
簌簌  
淚珠無數秋鴻春燕往還時  
莫忘了錦箋分付

酹江月

春愁幾許似春雲藹藹連空無數隱約眉尖偏易得沒  
箇因由分付楊柳烟濃海棠花暗綠漲牆頭路小樓應  
是有人和淚凝竚長記寶軸妝成鴛鴦繡嬾輕笑歌  
金縷香雪精神依舊否風月誰憐虛度帶減衣寬十分  
顚顚兩下平分取黃昏可更子規聲碎烟塢

傳言玉女

次岳總  
幹韻

日薄風柔池面欲平還皺紋楸玉子磔磔敲春晝繡衾  
半捲花氣濃熏香獸小團初試轆轤銀甃夢斷陽臺

甚情懷似病酒風簾羞對比年時更瘦雙燕乍歸寄與  
綠箋紅豆那堪又是牡丹時候

清平樂

西園啼鳥留得春多少客裏情懷無日好愁損連天芳  
草博山灰冷香殘微風吹滿銀箋卓午花陰不動一  
雙蝴蝶團圓

又

江上  
九日

西風獵獵又是登高節一片情懷無處說秋滿江頭紅

葉誰憐鬢影淒涼新來更點吳霜孤負萸囊菊盞年  
年客裏重陽

憶秦娥

秋蕭索梧桐落盡西風惡西風惡數聲新鴈數聲殘角  
離愁不管人飄泊年年孤負黃花約黃花約幾重庭  
院幾重簾幕

蝶戀花

碧樹涼颼驚畫扇窻戶齊開秋意參差滿先自離愁裁

不斷蛩螢更作聲聲怨  
山遶千重溪百轉隔了溪山  
夢也無由見歸計憑誰占近遠銀釭昨夜花如糝

醜奴兒

綺窓撥斷琵琶索一一相思一一相思無限柔情說似  
誰銀鈎欲寫回文曲淚滿烏絲淚滿烏絲薄倖知他  
知不知

劉鎮

字叔安南海人嘉泰二年進士  
自號隨如學者稱為隨如先生

劉潛夫云叔安樂府麗不至褻新不  
犯陳周柳辛陸之能事庶乎兼之



漢宮春

鄭賀守席  
上懷舊

日軟風柔望暖江連島晴綠平川尋芳拾藥勝伴陌上  
鮮妍玉驄歸路記青門曾墮吟鞭人去後庭花弄影一  
簾香月娟娟追念舊游何在歎佳期虛度錦瑟華年  
博山夜來燼冷誰換沉烟屏幃半掩奈夢雲不到愁邊  
春易老相思無據閒情分付魚箋

水龍吟

丙戌清明和  
章質夫韻

弄晴臺館收烟候時有燕泥香墜宿醒未解單衣初試

騰騰春思前度桃花去年人面重門深閉記彩鸞別後  
青驄歸去長亭路芳塵起十二屏山遍倚任蒼苔點  
紅如綴黃昏人靜暖香吹月一簾花碎芳意婆娑綠陰  
風雨畫橋烟水笑多情司馬留春無計濕青衫淚

浣溪沙

丁亥餞  
元宵

簾幕收燈斷續紅歌臺人散彩雲空夜寒歸路噤魚龍  
宿醉未消花市月芳心已逐柳塘風丁寧鶯燕莫匆

匆

清平樂

趙園避暑

柳陰庭院簾約風前燕著雨荷花紅半斂消得盈盈綠  
扇竹光野色生寒玉纖雪藕冰盤長記酒醒人靜暗  
香吹月闌干

危

稹字逢吉臨川人淳熙進士歷  
屯田郎出知漳州有巽齋集

漁家傲

老去諸餘情味淺詩情不上閒釵釧寶幌有人紅兩靨  
簾間見紫雲元在深深院十四條絃音調遠柳絲不

隔芙蓉面秋入西窓風露晚歸去懶酒酣一任烏巾岸

吳禮之

字子和錢唐人有  
順受老人詞五卷

蝶戀花

滿地落紅初過雨綠樹成陰紫燕風前舞烟草低迷縈  
小路晝長人靜扃朱戶沉水香銷新剪苧敲枕朦朧  
花底聞鶯語春夢又還隨柳絮等閒飛過東牆去

霜天曉角

西風又急細雨黃花濕樓枕一篙烟水蘭舟漾畫橋側

念昔空淚滴故人何處覓魂斷菱歌淒怨疎簾外暮

山碧

又

王生陶氏月夜共  
沉西湖賦此弔之

連環易闕難解同心結癡騃佳人才子情緣重怕離別  
意切人路絕共沉烟水濶蕩漾香魂何處長橋月短

橋月

劉先祖

字德脩簡州人登進士第慶元初官侍御史  
改司農少卿遷起居郎終顯謨閣直學士提

舉嵩山崇福宮卒謚  
文節有鶴林詞一卷

醉落魄

春風開者一時還共春風謝柳條送我今槐夏不飲香  
醪孤負人生也曲塘泉細幽琴寫胡牀滑簟應無價  
日遲睡起疎簾挂何不歸歟花竹秀而野

洞仙歌

荷花

晚風收暑小池塘荷淨獨倚胡牀酒初醒起徘徊時有  
香氣吹來雲藻亂葉底游魚動影空擎承露蓋不見  
冰容惆悵明妝曉鸞鏡後夜月涼時月淡花低幽夢覺

欲憑誰省且應記臨流凭闌干便遙想江南紅酣千頃  
昭君怨

人在醉鄉居住記得舊曾來去疎雨聽芭蕉夢魂遙  
惆悵柳烟何處目送落霞江浦明夜月當樓照人愁  
間丘次果

朝中措

浮遠堂

橫江一抹是平沙沙上幾千家到得人家盡處依然水  
接天涯危欄送目翩翩去鷁點點歸鴉漁唱不知何

處多應只在蘆花

馬莊父

字子嚴建安人  
自號古洲居士

二郎神

柳花

日高睡起又恰見柳梢飛絮倩說與年年相挽却又因  
他相誤南北東西何時定看碧沼青浮無數念蜀郡風  
流金陵年少那尋張緒應許雪花比並撲簾堆戶更  
羽綴游絲羶鋪小徑腸斷鶉鳩喚雨舞態顛狂恨腰輕  
怯散了幾回重聚空暗想昔日長亭別酒杜鵑催去



朝中措

竹

龍孫脫穎破苔紋英氣欲凌雲  
深處未須留客春風自掩柴門  
蒲團宴坐輕敲茶臼細撲爐熏  
彈到琴心三疊鷓鴣啼傷黃昏

孤鸞

沙堤香軟正宿雨初收落梅飄滿  
可奈東風暗逐馬蹄輕捲湖波又還漲  
綠粉牆陰日融烟暖驀地刺桐枝上  
有一聲春喚任酒帘飛動畫樓晚  
便指數燒燈時節

非遠陌上叫聲好是賣花行院玉梅對妝雪柳鬧蛾兒  
象生嬌顫歸去爭先戴取倚寶釵雙燕

李

洪

字子大廬陵人與弟漳泳沄沂著李氏花萼集五卷其姪直倫為之序

浪淘沙

櫻桃

上苑又春殘櫻顆如丹明光宮裏水晶盤想得退朝花  
底散宣賜千官往事記金鑾荔子難攀多情更有酪  
漿寒蜀客筠籠相贈處愁憶長安

李

泳

字子永洪弟

賀新郎

感舊

門掩長安道。捲重簾、垂楊散暑，嫩涼生早。午夢驚回庭  
陰翠，蝶舞鶯吟未了。正露冷芙蓉池沼。金鴈塵昏玄絃  
斷，理餘音、尚想腰肢裊。歡漸遠，思還繞。臨臯望極滄  
江渺。晚潮平、湘烟萬頃，斷虹殘照。彩舫凌波分飛後，別  
浦菱花自老。問錦鯉、何時重到。樓迥層城看不見，對瀟  
瀟暮雨，憐芳草。幽恨濶，楚天杳。

水調歌頭

題甘將軍  
廟卷雪樓

危樓雲雨上其下水扶天羣山四合飛動寒翠落簷前  
盡是清秋闌檻一笑波翻濤怒雪陣卷蒼烟炎暑去無  
迹清駛久翩翩夜將闌人欲靜月初圓素娥弄影光  
射空際渺嬋娟不用濯纓垂釣喚取龍宮仙駕耕此萬  
瓊田橫笛望中起吾意已超然

李

漳

字子清一作  
子申洪弟

多麗

好人人去來欲見無因記當時竊香倚煖豈期蜨散鷗

分到而今漫勞夢想歎後會慘啼痕繡閣銀屏知他何  
處一重山盡一重雲暮天杳梗踪萍跡還是寄孤村寂  
寥月今宵為誰虛照黃昏細追思深誠密意黯然一  
餉銷魂仗游魚謾傳尺素望塞鴻空憶回紋帳衾寒香  
銷塵滿博山沉水更誰熏斷腸也無聊情味唯是殢芳  
樽沉吟久移燈向壁掩上重門

李

浙

字子秀  
洪弟

踏莎行

送新城交  
代李達善

紅藥香殘綠筠粉嫩春歸何處尋春信繡鞍初上馬蹄  
輕舉頭便覺長安近別酒無情啼妝有恨山城向晚  
斜陽褪清江極目帶寒烟錦鱗去後憑誰問

鄭

域

字中卿號松窓三山人慶  
元中曾使金著燕谷剽聞

念奴嬌

戊午生  
日作

嗟來吐去被天公把做小兒調戲蹀雪龍庭歸未久還  
促炎州行李不半年間北燕南越一萬三千里征衫著  
破著衫人可知矣休問海角天涯黃蕉丹荔自足供

甘旨泛綠依紅無箇事時舞斑衣而已救蟻藤橋養魚  
盆沼是亦經綸耳伊周安在且須學老萊子

戴復古

字式之天台人陸游門  
人有石屏集詞一卷

清平樂

興國軍呈  
李司直

今朝欲去忽有留人處說與江頭楊柳樹繫我扁舟且  
住十分酒興詩腸難禁冷落秋光借取春風一笑狂  
夫到老猶狂

黃

銖

字子厚建安  
人有穀城集

江神子

晚泊  
分水

秋風嫋嫋夕陽紅  
晚烟濃暮雲重  
萬疊青山山外叫歸鴻  
獨上高樓三百尺  
憑玉楯睇層空  
人間日月去匆匆  
碧梧桐又西風  
北去南來消盡幾英雄  
擲下玉尊天  
外去多少事不言中

漁家傲

朱晦翁示歐陽  
公鼓子詞戲賦

永日離憂千萬緒  
雪舟遠汎清漳浦  
珍重故人寒夜語  
揮玉塵沉沉畫閣凝香霧  
風砌落花留不住  
紅蜂翠



蜨閒飛舞明日柳陰江上路雲起處蒼山萬疊人歸去

嚴

仁

字次山邵武人與同族嚴羽嚴參  
時稱邵武三嚴有清江欸乃一卷

黃叔賜云次山詞  
極能道閨閣之趣

玉樓春

春風只在園西畔薺菜花繁蝴蝶亂  
冰池晴綠照還空  
香徑落紅吹已斷  
意長翻恨遊絲短  
盡日相思羅帶  
緩寶奩如月不欺人  
明日歸來君試看

好事近

舟行

曉色未分明  
敲動月邊鼉鼓  
卯酒一杯徑醉  
又別君南浦  
春江如席  
照晴空  
大舶夾雙櫓  
腸斷斜陽渡口  
正落紅如雨

一落索

清曉鶯啼紅樹  
又一雙飛去  
日高花氣撲人來  
獨自個傷春無緒  
別後暗寬金縷  
倩誰傳語  
一春不忍上高樓  
為怕見分攜處

鷓鴣天

一曲危絃斷客腸津橋捩柁轉牙樯江心雲帶蒲帆重  
樓上風吹粉淚香 瑤草碧柳芽黃載將離恨過瀟湘  
請君看取東流水方識人間別意長

又

行盡春山春事空別愁離恨滿江東三更鼓潤官樓雨  
五夜燈殘客舍風 寒淡淡曉朧朧黃雞催斷丑時鐘  
紫騮嚼勒金銜響衝破飛花一道紅

易

袞

字彥祥一作彥章長沙人一云寧鄉人寧宗  
朝賜進士第一累官禮部尚書有山齋集

驀山溪

海棠枝上留得嬌鶯語雙燕幾時來並飛入東風院宇  
夢回芳草綠遍舊池塘梨花雪桃花雨畢竟春誰主  
東郊拾翠襟袖霑飛絮寶馬趁雕輪亂紅中香塵滿路  
十千斗酒相與買春閒吳姬唱秦娥舞撩醉青樓暮

趙善扛

字文鼎宗室  
號擗林居士

重疊金

玉關芳草粘天碧春風萬里思行客嬌馬向風嘶道歸

猶未歸 南雲新有鴈望眼愁邊斷膏沐為誰容倚樓

烟雨

十拍子

上已

柳絮飛時綠暗荼蘼開後春酣花外青帘迷酒思陌上  
晴光收翠嵐佳辰三月三 解珮人逢游女踏青草鬪  
宜男醉倚畫欄欄檻北夢遶清江江水南飛鸞與共驂

宴清都

餞明遠兄縣丞榮滿赴調

疎柳無情緒都不管渡頭行客欲去猶依賴得玉光萬

頃為人留住相從歲月如驚歎回首離歌又賦更舉目  
斜照沉沉西風剪剪秋墅君行定憶南池歌筵舞地  
花晨月午八輒步日三雍奏樂送君雲路別情未抵遺  
愛試聽取湖山共語便可能無意同傾一尊露醕

賀新郎

晝永重簾捲乍池塘一番過雨芰荷初展竹引新梢半  
含粉綠蔭扶疎滿院過花絮蜨稀蜂懶窓戶沉沉人不  
到伴清幽時有流鶯囀凝思久意何限玉釵墜枕風

鬟顫湛虛堂壺冰瑩徹簟波零亂自是仙姿清無暑月  
影空隨素扇破午睡香銷餘篆一枕湖山千里夢正白  
蘋烟棹歸來晚雲弄碧楚天遠

毛

旴

字平仲信安人仕止  
州倅有樵隱詞一卷

滿庭芳

自宛陵易倅東  
陽留別諸同寮

世事難窮人生無定偶然蓬轉萍浮為誰教我徙宦到  
東州還似翩翩海燕舞春至歸及涼秋回頭笑渾家數  
口又泛五湖舟悠悠當此去黃童白叟莫謾相留但

谿山好處深負重游珍重諸公送我臨岐淚欲語先流  
應須記從今風月相憶在南樓

滿江紅

潑火初收秋千外輕烟漠漠春漸遠綠楊芳草燕飛池  
閣已著單衣寒食後夜來還是東風惡對空山寂寂杜  
鵑啼梨花落傷別恨閒情作十載事驚如昨向花前  
月下共誰行樂飛蓋低迷南苑路前裙悵望東城約但  
老來顚顚惜春心年年覺



謁金門

春已半芳草池塘綠遍山北山南花爛熳日長蜂蝶亂  
閒掩屏山六扇夢好強教驚斷愁對畫梁雙語燕故  
人心不見

畫堂春

華燈收盡雪初殘踏青還爾游盤落梅強半已飛翻剗  
地春寒多病故人日遠幾時雙燕來還可憐樓上一  
凭欄不見長安

王 璽

一作或字子文號潛齋金華人以父介蔭補官嘉定十二年進士第寶祐初拜端明殿學士僉書樞密院事封吳郡侯卒贈七官位特進

西河

天下事問天怎忍如此陵圖誰把獻君王結愁未已少  
豪氣槩總成塵空餘白骨黃葦千古恨吾老矣東游  
曾弔淮水繡春臺上一回登一回搵淚醉歸撫劍倚西  
風江濤猶壯人意只今袖手野色裏望長淮猶二千  
里縱有英心誰寄近新來又報烽烟起絕域張騫歸來

未

曹 函

字西士號東畝瑞安人嘉泰二年進士第累官左司諫以論事忤旨遷起居郎進禮部待制致仕謚文恭

西河

和王潛  
齋韻

今日事何人弄得如此漫漫白骨蔽川原恨何日已關  
河萬里寂無烟月明空照蘆葦謾哀痛無及矣無情  
莫問江水西風落日慘新亭幾人墮淚戰和何者是良  
籌扶危但看天意只今寂寞數澤裏豈無人高卧間

里試問安危誰寄定相將有詔催公起須信前書言猶未

洪咨夔

字舜俞於潛人嘉定二年進士累遷吏部侍郎兼給事中進刑部尚書拜翰林學士知制誥加端明殿學士卒贈兩官有平齋集詞一卷

眼兒媚

平沙芳草渡頭村綠遍去年痕遊絲下上流鶯來往無限銷魂  
綺窓深靜人歸晚金鴨水沉溫海棠影下子規聲裏立盡黃昏

趙汝迂

字叔午樂清人嘉定中登第僉判雷州以詩忤權要謫官尋卒

清平樂

初鶯細雨楊柳低愁縷  
烟浦花橋如夢裏  
猶記倚樓別語  
小屏依舊圍香恨  
拋薄醉殘妝判却寸心雙淚  
為他花月淒涼

章

穎 字茂獻臨江軍人第進士累官禮部尚書兼侍讀贈光祿大夫謚文肅

小重山

柳暗花明春事深  
小欄紅芍藥已抽簪  
雨餘風軟碎鳴

琴遲遲日猶帶一分陰  
把酒莫沉吟身閒無箇事且  
登臨舊游何處不堪尋  
無尋處惟有少年心

郭應祥

字承禧臨江人嘉定間進士官楚越間有笑笑詞一卷

玉樓春

匆匆相遇匆匆去恰似當初元未遇  
生憎黃土嶺頭塵  
強學章臺街裏絮  
雨荒三徑雲迷路總是離人堪恨  
處從今對酒與當歌  
空惹離情千萬緒

陸子逸

號雪窓會稽人左丞相之孫者舊續聞稱為陸辰州

瑞鶴仙

臉霞紅印枕睡起來冠兒猶是不整屏間麝煤冷但眉  
山壓翠淚珠彈粉堂深晝永燕交飛風簾露井悵無人  
與說相思近日帶圍寬盡重省殘燈朱幌淡月疎窓  
那時風景陽臺路遠雲雨夢更無準待歸來先指花梢  
教看却把心期細問問因循過了青春怎生意穩

張叔夏云

景中帶情  
屏去浮艷

詞綜卷十六